



Inatsisartuni ilaasortaq
Siverth K. Heilmann, Atassut
/Maani

Akissuteqaatit § 37 naapertorlugu apequtigineqartunut nr. 86-imi, Kangia 957 – 04.14-imi takornariartitsinernut akuersissuteqarnissamut atatillugu

Asasara Siverth K. Heilmann.

08-05-2023
Suliap normua 2023-
11312

Inatsisartut suleriaasianni § 37 naapertorlugu Naalakkersuisunut apeqquteqaateqarputit, akiliisitsilluni aalisartitsiumalluni takornariartitsisarnermut atatillugu akuersissummik nalunaaruteqartoqarnissaanut Qeqqata Kommuniyani kuummi Kangia Maniitsup eqqaaniittumi suliamik ingerlatsineq pillugu.

Postboks 1601
3900 Nuuk
Tlf. (+299) 34 50 00
E-mail: isiin@nanoq.gl
www.naalakkersuisut.gl

Naalakkersuisut suliata ataasiakkaat oqaaseqarfigisinnaanngimmagit, apequtigisatit ataatsimut isigisumik akissuteqarfigineqarput. Apequtigisatit uannut akisassanngorlugit innersuunneqarsimapput.

Apeqqutit ataasiakkaarlugit uani ataani issuarneqartarput, kingornanilu akissuteqarfigineqarlutik.

Apeqqut 1:

1. Akiliisitsilluni takornarissanut kuunni eqalunniartitsisarnermi Kangia 957 – 04.14 suliaq 2023-5038 Naalakkersuisut Suliffeqarfiup Maniitsumi angerlarsimaffeqartup, Naalakkersuisunit 1. Januar 2024 atuutilersussamik itigartitsiniarneq qanoq tunngavilersorneqarpa? Suliap suliarineqarnera tamaat nassuiaqquneqarpoq.

Akissut:

Qeqqata Kommunian suleqatigalugu Nunanut Allanut, Inuussutissarsiornermut Niuernermullu Naalakkersuisoqarfiup kuuit 10-it kommunip akiliuteqarluni aalisartitsivigalugit takornariartitsinermut akuersissuteqarfiusartussatut toqqarsimasai neqeroortitsivigisimavai, taakkualu ilagaat § 37 naapertorlugu apequtigineqartoq kuuk Kangia 957 – 04.14. kuuit quliusut pineqartut ilaat.

Neqeroortitsineq Sumiiffinni nunami aalajangersimasuni takornariartitsinermut akuersissuteqartarnissaq pillugu Inatsisartut inatsisaat nr. 19, ulloq 3. december 2012-imeersumi, allanngortinneqartumi Sumiiffinni nunami aalajangersimasuni takornariartitsinermut akuersissuteqartarnissaq pillugu Inatsisartut inatsisaat nr. 19, 3. december 2012-imeersup allanngortinnissaa pillugu Inatsisartut inatsisaat

(Inatsisip atuuffigisaa sukisaarsaatigalugu aalisarnermut akuersissutinut sumiiffikkaanullu pilersaarutinut piginnaatitsissummik ilaqarterlugu annertusissaaq) naapertorlugit ingerlanneqarpoq.

Neqeroortitsineq pivoq piffissami 19. december 2022-imiit 6. februar 2023-imut.

Piffissami neqeroortitsiviusumi matumani soqutigisaqartut ilassutitut paasissutissanik nalornissuteqarnerminni Qeqqata Kommunianut aamma Nunanut Allanut, Inuussutissarsiornermut Niunermullu Naalackersuisoqarfimmut piniarsinnaapput.

Piffissap qinnuteqartitsiviusup naareernerani qinnuteqaatit tiguneqarsimasut ataatsimiititaliamit nalilersuisussaataasumit Qeqqata Kommunianiit, Aalisarnermut Piniarnermullu Naalackersuisoqarfimmiit kiisalu Nunanut Allanut, Inuussutissarsiornermut Niunermullu Naalackersuisoqarfimmiit ilaasortaqaartumit nalilersuivigineqartarput.

Inatsisartut inatsisaanni nr. 19, ulloq 3. december 2012-imeersumi nalunaarneqarput akuersissummik tunniussinissanut atugassarititaasut qanoq ittut tunngavigalugit nalilersuisoqartussaasersoq. Akuersissummik tunniussinissanut atugassarititaasut assigiinngiiaartunik oqimaalutarneqartarput, tamatumalu kingornagut qinnuteqaatit naliliivigineqarlutillu pointinik tunineqartarput, piumasqaataasut pineqartut qanoq annertutigisumik naammassineqarsimani tunngavigalugit. Tunniussinissamut atugassarititaasut oqimaalutaasarnerrillu imaattarput:

1. Qinnuteqartup teknikkikkut suliassanullu fagitigut piginnaaneri (qanoq pisiusorsiortigineq). Oqimaalutaaneq: 25%.
2. Qinnuteqartup aningaasaqarnikkut tunuliaqutarisai. Oqimaalutaaneq: 25%.
3. Qinnuteqartup qanoq piumasuseqatiginera piginnaaneqartigineralu suliffissanik pilersitsinissamut, aamma najukkami nioqquteqartartunik atuinissamut suliassani, tunisaqartarnerni kiffartuussisarnernilu, kiisalu periaatsit atorneqartut qinnuteqartup pilersaarusiernerani takornariartitsinikkut nioqqutiginiakkaminik tunniussaqaartarnissami. Oqimaalutaaneq: 50%.

Qinnuteqartut arlaqarsimappata takornariartitsisarnermut akuersissummik tunniussisoqassaaq oqimaalutaanermi qaffasinnerpaanik angusaqartumut.

Kangia 957 – 04.14 -mi kuummut qinnuteqartut arlaqarsimapput, siulianilu pineqartut naapertorlugit periaasissanik tunngavilimmik oqimaalutaanermi qaffasinnerpaanik angusaqartumut takornariartitsinermut akuersissut 1. Januar

2024-imiit aallartittussamik Naalakkersuisumut inassuteqaataasut naapertorlugit tunniunneqarluni.

Apeqqu 2:

Kangiani illuaqqat allilerneqarput, angallammillu akuerisamik pisaarput, aningaasarparujussuit nukippassuit atorlugit inerisaasoqarpoq takornarissammi tikittartut ukiullu tulleriit arlalinnut inniminniisut amerliartuinnavimmata. Qinnuteqaatip suliarineqarnerani tamakku apeqqutaatinneqarpat?

Akissut:

Suliami pissutsit attuumassuteqartut tamarmik isiginiarneqartarput takornariartitsinermut akuersissuteqarnissamik nalilersuisoqarnerani.

Apeqqu 3:

Naalakkersuisut tunngavilersuisinnaappat sooq Maniitsumi suliffeqarfiup takornarialerisartutut aallarlerlaap allanut Sisimiuniittunut tunniunneqartussanngorneranut?

Akissut:

Apeqqummut 1-imut akissut innersuunneqassaaq.

Apeqqu 4:

Paasissutissat nutaat saqqummiunneqareernerisa kingorna, suliffeqarfiullu aningaasarparujussuit atoreeraat inerisaareersullu suli Naalakkersuisut aalajangiineq taamaattoq attatiinnarusuppaat?

Akissut:

Qinnuteqaateqartut tamarmik Qeqqata Kommuniani kuunnut neqeroortitsiviusunut qinnuteqaatimi saniatigut pappialanik uppersaatinik qinnuteqaammut ilalersuutaasunik nassiussisussaapput. Qinnuteqaatit amigaateqarsimagaangata qinnuteqartut qinnuigineqartarput uppersaatit ilassutissaannik nassiussaqaqqullugit.

Tamatuma kingornagut qinnuteqaatit nalilersuivigineqartarput, takornariartitsisarnermullu akuersissutinik apeqqummut siullermut akissummi pineqartunik tunngavilinnik akuersissuteqartoqartarluni.

Taamaattumillu Naalakkersuisut qularinngilaat sulianik ingerlatsineq peqqissaartumik tamakkiisunillu tunngavilimmik suliarineqartartoq, taamalu pissutissaqartinnagu aalajangiinerup allanngortinnissaanut.

Inussiarnersumik inuulluaqqusillunga

Vivian Motzfeldt

Vivian Motzfeldt

Nunanut Allanut, Inuussutissarsiornermut Niuernermullu Naalakkersuisoq